



**RELATÓRIU KONA-BA  
ID ÚNIKU  
KOMISAUN TÉNIKU EVENTUAL**

**JUÑU 2020 – MAIU 2021**

**SEKRETARIADU ID ÚNIKU  
TIC TIMOR I.P.**

## Tabela conteúdu

|   |            |
|---|------------|
| <b>Abreviatura</b>  | <b>iii</b> |
| <b>Glosáriu Lia-fuan</b>  | <b>iv</b>  |
| <b>Tabela no Figura</b>   | <b>vi</b>  |
| <b>1. Informasaun Antecedente</b>                                 | <b>1</b>   |
| <b>2. Komisaun Tékniku ID Úniku</b>                               | <b>2</b>   |
| <b>3. Planu Asaun</b>   | <b>3</b>   |
| <b>4. Atividade no Marku-Istóricu sira</b>                        | <b>3</b>   |
| <b>4.1 Arranju Organizacional sira</b>                            | <b>3</b>   |
| <b>4.2 Dezenvolvimentu planu estratéjiku ID Úniku</b>             | <b>5</b>   |
| 4.2.1 Prosesu   | 5          |
| 4.2.2 Esbosu Planu Estratéjiku Inisial                            | 7          |
| <b>4.3 Opsaun sira Implementasaun ID Úniku</b>                    | <b>8</b>   |
| 4.3.1 Sertidaun Moris Opsional                                    | 9          |
| 4.3.2 Sertidaun Moris Obrigatóriu (Prosesu Rejistrasaun Konjuntu) | 10         |
| 4.3.3 Rejistu Úniku (Presiza Sertidaun Moris)                     | 11         |
| 4.3.4 Liña-Tempu  | 13         |
| 4.3.5 Jestaun Identidade Dijital                                  | 14         |
| <b>4.4 Komunikasaun &amp; Konsultasaun</b>                        | <b>17</b>  |
| <b>4.5 Politika &amp; Kuadru Legal sira</b>                       | <b>17</b>  |
| <b>4.6 Re-estrutura (re-engineering) Bazedadus Funsional</b>      | <b>18</b>  |
| <b>5. Finalizasaun planu estratéjiku ID Úniku</b>                 | <b>19</b>  |
| <b>6. Preokupasaun no dezafius sira</b>                           | <b>22</b>  |
| <b>Rekoñesimentu</b>  | <b>28</b>  |

## Abreviatura

|        |   |
|--------|---|
| CRVS   | Rejistrasaun Sivil no Estatística Vitál                   |
| BD     | Bazedadus   |
| DMIS   | Sistema Informasaun Jestaun Demográfiku                   |
| DM     | Data Moris  |
| RU     | Rekursu Umanu   |
| DJE    | Diresaun Jerál Estatísticas                               |
| ICT    | Teknolojia Informátika no Komunikaun                      |
| ID     | Identifikadór ka Identifikasaun                           |
| SIJ    | Sistema Informasaun Jestaun                               |
| ME     | Ministériu Edukasaun                                      |
| MS     | Ministériu Saúde  |
| MJ     | Ministériu Justisa  |
| MRLAP  | Ministériu ba Reforma Lejizlativa no Asuntu Parlamentár   |
| MSSI   | Ministériu Solidaridade Sosiál no Inkluzsaun              |
| MTC    | Ministériu Transporte & Komunikaun                        |
| FM     | Fatin Moris   |
| RDTL   | Repúblika Demokrátika Timor-Leste                         |
| STAE   | Sekretariadu Tékniku ba Administrasaun Eleitorál          |
| PE     | Planu Estratéjiku   |
| TL     | Timor-Leste   |
| IDU    | Identifikasaun Dijital Úniku, Identifikadór Dijital Úniku |
| NIU    | Númeru Identifikadór Úniku                                |
| PNUD   | Programa Nasoins Unidas ba Dezenvolvimentu                |
| UNICEF | Fundu Emerjénsia Internasionál Nasoens Unidas ba Labarik  |

**Autentikasaun,**<sup>1</sup> prosesu atu estabelese konfidénsia katak ema ida mak hanesan ho ema naran ne'ebé sira reklama. Autentikasaun dijital envolve ema ida ne'ebé apresenta eletronicamente "fatór" ida ka liután atu "afirma" sira-nia identidade—katak, atu prova katak sira mak ema hanesan de'it ho ida-ne'ebé identidade ka kredensial uluk fó-sai ba tiha ona. Fatór hirak-ne'e bele inklui buat ne'ebé ema ida hatene (n.e., seña ka PIN ida), iha (n.e., billete ID, simbolu, ka kartaun SIM telemovel nian), ka mak (n.e., nia impresaun limafuan-fatin).

**Dadus biográfiku,** refere ba atributu kona-ba ema ida ka nia moris, ne'ebé la'ós biométriku (katak, biológiku ka hahalok). Iha sistema IDU ida-ne'e inklui informasaun kona-ba naran, data moris, fatin moris, naran inan no aman nian. Hanesan mos **Dadus Demográfiku.**

**Dadus biométriku,** Atributu biológiku (impresaun limafuan-fatin, oin, iris, lian) ka hahalok (lala'ok, kaligrafia, asinatura, asaun hanehan tekla) individuál nian ne'ebé bele uza ba rekoñesimentu biométriku. Ida-ne'e mak partikulár ba ema ida-ida, no bele uza atu deduplika rejistu identidade sira durante rejistu, ka ba verifikasaun biométriku ne'ebé uza durante prosedimentu autentikasaun atu hala'o apár ema 1:1.

**Identidade sivil,** karakterístika bázika hosi indivídu nia identidade (n.e., naran, seksu, fatin no data moris), konfere ba nia liuhosi rejistu no emisaun sertidaun liuhosi autoridade rejistu sivil autorizadu hafoin nia moris. Identidade legál lakon ho emisaun sertidaun mate liuhosi autoridade rejistu sivil hafoin rejistu mate.

**Rejistrasaun sivil,** rejistu kontínuu, permanente, obrigatóriu no universál hosi akontesimentu no karakterístika eventu vitál sira-niann relasiona ho populasau, hanesan dispoin hela liuhosi dekretu-lei ka regulamentu tuir rekizitu legál iha nasaun ida-idak. Rejistu sivil hala'o prinsipalmente ho finalidade atu estabelese dokumentu sira ne'ebé dispoin hela tuir lei.

**Identidade dijital,** nu'udar koleasaun hosi atributu identidade sira ne'ebé kapta no rai-hela eletronicamente ne'ebé deskrevé unikamente ema ida iha kontestu partikulár ida no ne'ebé uza ba tranzasaun eletróniku sira. Sistema identidade dijital refere ba sistema no prosesu sira-ne'ebé jere siklu-moris hosi identidade dijital individuál. Ema ida-nia identidade dijital bele kompostu hosi variedade atributu sira, inklui **dadus biográfiku** no **dadus biométriku** (ez, impresaun liman-fuan fatin, imajen dijital hosi iris, impresaun liman fatin) no mós atributu sira-seluk ne'ebé iha relasaun jeneralizadu liu ba saida mak ema ne'e halo ka buat ruma ne'ebé ema seluk hatene kona-ba indivíduu ne'e. Bainhira dadus hirak-ne'e rekolla no verifika tiha, bele uza dadus sira ne'e atu identifika ema ida liuhosi hatan ba pergunta "Ita mak sé?". Atributu hirak-ne'e, hamutuk ho kredensial ne'ebé fó-sai hosi forneseidór servisu (ez., número ID úniku, eDokumentu, eID, ID movel) entaun bele mós uza nu'udar **fatór autentikasaun** atu hatán ba pergunta "Ita mak ema

<sup>1</sup> Termu hirak-ne'e mak bazeia ba "Practitioners Guide" World Bank Group Identification for Development <https://id4d.worldbank.org/guide/glossary>

ne'e duni ka lae?" Atributu no fatór autentikasaun uza iha identidade dijitál bele iha variasaun hosi kontestu ka país ida ba ida seluk depende ba tipu sistema identidade. Identidade dijitál sira ne'e kria no uza hanesan parte hosi siklu-moris ida ne'ebé inklui faze fundamentál tolu: (a) rejistu, inklui inskrisaun no validasaun, (b) emisaun dokumentu ka kredensiál, (ka sertidaun) no (c) autentikasaun ba prestasaun servisu ka tranzasaun sira.

**E-Governu**, aplikasaun hosi Teknolojia Informátika no Komunikasaun ba funsaun no prosedimentu governu nian ho finalidade atu aumenta efisiénsia, transparénsia no partisipasaun sidadaun sira-nian.

**ID Fundasional, ka Rejistu, ka bazedadus**, nu'udar sistema identifikasaun ne'ebé kria prinsipalmente atu jere informasaun identidade ba populasaun jerál no mós atu fornese kredensiál sira-ne'ebé serbí hanesan prova identidade ba tranzasaun no servisu setór públiku no privadu ho variedade oin-oin. Ne'e hanesan Sistema IDU iha kontestu ida-ne'e.

**ID Funsional, ka Registu, ka Bazedadus**, nu'udar sistema ida ne'ebé kria atu responde ba demanda hosi servisu ka tranzasaun partikulár, ne'ebé bele fó-sai kartaun ka seña identidade ida hanesan ID votante, karta kondusaun, rejistu saúde, nsst. Hirak-ne'e ema bele aseita baibain ba finalidade identifikasaun jeneralizadu, maibé karik la fornese identidade legál tomak

**Prova hosi identidade legál** mak define nu'udar kredensiál, hanesan sertidaun moris, kartaun identidade ka kredensiál identidade dijitál ne'ebé rekoñese hanesan prova hosi identidade legál tuir lei nasional no halo tuir norma no prinsípiu internasionál emergente.

**IDU, Sistema Identidade Úniku**, nudar sistema ne'ebé jere identidade dijitál

**NIU, Número Identifikasaun Úniku**, número ida-ne'ebé unikamente identifika ema ida—katak, ema ida-idak iha NIU ida-de'it no nunka iha ema rua ho NIU hanesan. NIU sira mak jeralmente dezinada ba ema nia moris tomak (katak, sira-nia número la muda tuir tempu), tipikamente hafoin liu tiha validasaun ema nia identidade no singularidade liuhosi prosesu deduplikasaun. Ida-ne'e nu'udar número ne'ebé bele uza atu liga identidade entre bazedadus no sistema sira iha setór públiku nomos privadu.

## Tabela no Figura

|   |    |
|---|----|
| Figura 1: Koodenador ID Úniku no Pontu Fokal hosi Ministériu Justisa iha Enkontru Komisaun sira ida ..... | 5  |
| Figura 2: Apresentasaun Esbosu Planu Estratéjiku ID Úniku ba Komisaun Interministerial .....              | 7  |
| Figura 3: Sistema hotu komunika via sistema ID ÚNIKU.....   | 11 |
| Figura 4: Sistema hotu komunika via DMIS .....  | 13 |
| Figura 5: Liña-Tempu Projetu .....  | 14 |
| Figura 6: Jestaun Identidade Dijital .....  | 16 |
| Figura 7: Atualiza Progresu ba Primeiru Ministru.....   | 17 |
| Figura 8: Konsultasaun Lei Privasidade no Protesaun Dadus.....  | 20 |
| Figura 9: Konsultasaun Estratéjia ID Úniku ho Parseiru Dezenvolvimentu sira .....                         | 20 |
| Figura 10: Konsultasaun Estratéjia ID Úniku ho Organizasaun Sosiedade Sivil sira .....                    | 21 |
| Figura 11: Konsultasaun Estratéjia ID Úniku ho setor Privadu.....   | 22 |

## 1. Informasaun Antecedente

Ho adere ba prinsipiu hosi 'la-husik ema ida ba-kotuk', no atu atinji rezultadu dezvoltamentu ida ho ekuidade, sentralizadu ba povu, Governu Konstitusional Da-8 Timor-Leste nian fo énfaze ba nesidade atu kontinua ajenda reforma barak inklui reforma iha administrasaun pública.

Ajenda<sup>2</sup> reforma administrasaun pública alista implementasaun hosi sistema Identifikasaun Úniku modernu ida nudar komponente xave ba implementasaun E-Governu (rezultadu 1.5) ho konsiderasaun katak sistema ne'e bele fornese benefisiu signifikante. Sistema ID Úniku ida bele permite governu atu hadi'ak prestasaun servisu públiku, hadi'ak jestaun no koordenasun politika social. Alende ne'e, permite Governo no setor privadu atu identifika diak liu ninia sidadaun sira, no ema sira iha ninia fronteira laran hodi responde ba pergunta hanesan "*Ita boot ne'e se?*", "*ita boot mak ida ne'e duni ka?*", "*Ita boot mak autorizadu ka elijivel ba buat ruma ka?*".

Sistema ID Úniku mos fornese oportunidade ida ba Timor-Leste atu aselera ninia hakaran atu atinji Meta Dezvoltamentu Sustentável (SDGs) liu-liu Meta 9, ne'ebé hateten kona-ba dezvoltamentu infraestrutura ho qualidade, hetan konfiansa, sustentável no reziliente, inklui infraestrutura rejional no trans-fronteira atu suporta dezvoltamentu ekonómiku no bem-estar humanu, ho fokus ida ba asesu servisu públiku ba ema hotu ho equidade no kustu asesivel. Meta SDG 16.9 hateten kona-ba importánsia identidade legal atu promove sosiedade justu, pasifiku no inkluzivu. Identifikasaun hosi ema hotu sei ajuda SDG 5.3 – Halakon prátika sira hotu ne'ebé halo at, hanesan kazamentu sedu no forsadu ba labarik. Meta SDG 17.18 maka atu aumenta ho signifikativu disponibilidade dadus dezagregadu ne'ebé qualidade-ás, ho prontidaun, no bele hetan konfiansa, ne'ebé agora dadaun la disponivel tamba taxa Rejisto Sivil ne'e tun. Ikus liu, 67 hosi indikador SDG 232 bele kalkula kompletamente ka parcialmente ho uza dadus hosi Sistema IDU no indikador SDG barak mak sukat hanesan proporsaun ida hosi populasaun total, la'os deit populasaun ne'ebé rejistu ona iha Sistema Rejistrasaun Sivil, ne'ebé la-kompletu no la inklui ema laos-sidadaun, estranjeiru, ema laiha nacionalidade no refujiadu sira.

---

<sup>2</sup> Programa Reforma Administrasaun Pública (RAP) 2019-2023

Jornada Sistema ID Úniku hahú bainhira MRLAP (agora PCM) koordena avaliasaun prontidaun 'e-readiness' Timor-Leste nian atu implementa ID Úniku iha 2019. Avaliasaun ne'e hetan apoiu hosi UNDP no UNICEF. TIC TIMOR nudar ajénsia TIC sentral hola parte iha prosesu avaliasaun ne'e. TIC TIMOR ho MRLAP hamutuk prezenta rezultadu avaliasaun ne'e ba Konsellu Ministrus iha Fevereiru 2020. Konsellu Ministrus decide atu forma Komisaun Tékniku Eventual ne'e liu hosi Rezolusaun Governu númeru 9/2020 iha Marsu<sup>3</sup>.

## 2. Komisaun Tékniku ID Úniku

Komisaun Tékniku Eventual (KTE) ID Úniku ne'e hetan mandatu hosi rezolusaun Governu númeru 9/2020 iha 19 Marsu 2020 atu prepara Estratéjia Integrada ida ho objetivu atu implementa sistema Identifikasaun Úniku ida ba Sidadaun Timor no rezidente estranjeiru sira, nomos nia orsamentu no planu operasaun hodi submete ba Konsellu Ministrus atu hetan aprovasaun iha fulan 6 nia laran. Iha relatóriu laran, liafuan komisaun no KTE uza troka malu.

Membru sira hosi Komisaun ne'e konsiste hosi:

1. Presidénsia Konsellu Ministrus (PCM)
2. Ministériu Justisa (MJ)
3. Ministériu Finansas (MF)
4. Ministériu Solidariedade Sosial no Inkluzsaun (MSSI)
5. Ministériu Edukasaun (ME)
6. Ministériu Saúde (MS)
7. Ministériu Administrasaun Estatal (MAE)
8. Ministériu Interior (MI)
9. Komisaun Funsan Públika (KFP)
10. TIC TIMOR I.P.

---

<sup>3</sup> RG No 9/2020 bele hetan iha ne'e [http://www.mj.gov.tl/jornal/public/docs/2020/serie\\_1/SERIE\\_I\\_NO\\_12.pdf](http://www.mj.gov.tl/jornal/public/docs/2020/serie_1/SERIE_I_NO_12.pdf)



Tamba Covid-19 no restrisaun estadu emerjénsia, serbisu sira hetan adia. Komisaun ne'e hahú servisu iha 18 Juñu 2020 no KTE hala'ó enkontru dala 22 hamutuk ho enkontru sub-komisaun balun ne'ebé espesializadu ba área sira iha Tékniku no Legal.

Relatóriu ida ne'e kobre atividade sira ne'ebé hala'ó hosi hahú servisu komisaun nian iha Juñu 2020 to'o Maiu 2021, bainhira Planu Estratéjiku ne'e submete ba Konsellu Ministrus iha loron 26 Maiu 2021.

### 3. Planu Asaun

Komisaun ne'e konkorda kona-ba planu asaun ida ne'ebé hakerek liña-jeral kona-ba estratéjia no atividade sira ne'ebé presiza atu kompleta ninia servisu to'o final fulan nen (6), hahú hosi Juñu to'o Novembru 2020. Planu asaun ne'e fornese informasaun detailladu kona-ba estratéjia no atividade sira nomos indikador susesu sira. Planu asaun ne'e revé fila-fali bainhira servisu hala'ó dadaun no mandatu KTE prolonga tan ba fulan 6 adisional. Aneksu 1 fornese detaille kona-ba planu asaun.

Planu asaun ne'e hato'ó sekuénsia atividade sira bazeia ba meta principal tolu:

1. Arranju organizasional
2. Dezenvolvimentu planu estratéjiku ID Úniku
3. Apresentasaun opsaun sira ba ID Úniku
4. Dezenvolvimentu Planu Operasional no Orsamentu
5. Finalizasaun Planu Estratéjiku Integradu, Planu Operasional no Orsamentu

### 4. Atividade no Marku-Istóriu sira

#### 4.1 Arranju Organizasional sira

Iha loron dahuluk enkontru KTE ne'ebé hala'ó iha 8 Juñu 2020, KTE desidi atu estabelese sekretariadu projetu iha TIC TIMOR I.P. no foti Jestora Sekretariadu ida, Sra Elizabeth Baptista, ne'ebé mos nudar asesora ida ba Politika TIK no Governansa Eletronika ba TIC TIMOR no finansia

hosi Governance for Development (GfD). Komisaun ne'e mos estabese sub-komisaun rua iha komisaun laran atu diriji diskusaun kona-ba tékniku no kuadru legal sira. Komisaun ne'e foti Sr. Justo Fernandes, Diretor Departamentu Aplikasaun iha TIC TIMOR atu lidera ekipa tékniku, no Sra. Cristina Lima, Asesor Reforma Legal hosi PCM atu lidera ekipa legal.

Sekretariadu hetan apoiu hosi asesor tékniku sira hosi TIC TIMOR no PCM: Sr. David Air (Asesor GfD ba Politika TIC & E-Governansa iha TIC TIMOR), Sr. Dan Kobb (Asesor Reforma Administrativa hosi PCM), Sra Cristina Lima (Asesor Reforma Administrativa hosi PCM). Asisténsia administrativa hetan fornese ba Sekretariadu iha 2021 liu hosi asesor sira, Peregrina Amaral (Analista Business, Sekretariadu ID Úniku) no Aleixo da Cruz (Administrador, Sekretariadu ID Úniku) ne'ebé finansia husi DFAT liu hosi GfD.

Sekretariadu ne'e mos hetan apoiu hosi UNICEF liu hosi provizaun hosi Espesialista Komunikaun nasional ida, Sra Ana Sequeira, ne'ebé rekruta ba servisu kurtu prazu durante semana 6 hodi fornese estratéjia komunikaun ba ID úniku ne'e.

Asisténsia signifikativu hetan hosi ekipa Identifikasaun ba Dezenvolvimentu (ID4D) Banku Mundial nian ba dezenvolvimentu Planu Operasional no Orsamentu, nomos halo revizaun no fornese orientasaun nudar peritu nian ba Planu Estratejiku ne'e. Alende ne'e, simu asisténsia nudar peritu tékniku nian husi Ernst and Young (liu hosi kontaktu ADB) no UNDP.

Tamba orsamentu duo-desimal iha 2020 difisil atu aseguara finansiamentu ba sekretariadu atu hala'o ninia atividade hodi suporta komisaun tékniku ID Úniku. Sekretariadu halo aprosimasaun ba parseiru dezenvolvimentu balun no simu asisténsia tékniku hosi DFAT, UNICEF, no Banku Mundial. Ho falta orsamentu operacional rasik iha 2020, sekretariadu hala'o ninia atividade liu hosi apoiu TIC TIMOR, PCM, asisténsia hosi GfD via finansiamentu husi DFAT no kontribuisaun voluntáriu (in-kind) hosi membru KTE sira. Alende ne'e, ho falta orsamentu iha 2020, sekretariadu la bele rekruta pesoal no tenki konfia deit ba voluntáriu no estajiáriu sira atu fornese apoiu administrativu no lojistiku. Iha 2021, suporta tékniku adisional no orsamentu operacional hetan fornese husi TIC Timor no GfD.

## 4.2 Dezenvolvimentu planu estratéjiku ID Úniku

### 4.2.1 Prosesu

Dezenvolvimentu inisial ba planu estratéjiku ID Úniku hahú ho análize ba deskoberta hosi relatóriu análize ba lakuna preliminaríu ne'ebé produs hosi peritu Estonia sira iha 2019. Relatóriu ne'e dala barak refere hanesan relatóriu Estónia iha dokumentu sira ID Úniku nian. Relatóriu ne'e fornese fundasaun forte maibe la hakerek hanesan planu governu no la klaru kona-ba desizaun estratéjiku sira. Ne'eduni, iha mandatu KTE nian mak atu revé relatóriu ne'e, hala'o tan levantamentu profundu ida, hodi hetan resposta sira ba pergunta estratéjiku xave balun ne'ebé relasiona ho dezeñu no justifikasaun ba sistema no aprosimasaun ba ID Úniku, analiza opsaun estratéjiku sira no konkorda kona-ba pasu ba oin atu prepara planu estratéjiku integradu ida. Sira ne'e hotu hala'o liu hosi diskusaun forte, nakloke no franku nomos liu hosi survei online. Aneksu 2 fornese detaille kona-ba kestionáriu survey ne'e.



**Figura 1: Koodenador ID Úniku no Pontu Fokal hosi Ministériu Justisa iha Enkontru Komisaun sira ida**

Iha inisiu, Ministériu KTE ida-idak no CSC apresenta análise situasional ida ba komisaun atu hatudu sira nia nesesidade individual no preokupasaun sira ho sira nia solusaun ne'ebé iha kona-ba identidade. Ida ne'e fornese antesedente ba komisaun ne'e atu komprende rekizitus sira ba ID Úniku. Husi ne'e, mak apresenta, diskute no konkorda en-jeral pergunta estratéjiku balun, hanesan nesesidade atu iha biométriku sira ba autentikasaun no deduplikasaun, ne'ebé IDU mak identidade dijital ida, ho identidade legal mantein nafatin ho MJ, no kartaun identidade ida sei produs hosi IDU. Enkontru komisaun sira ne'e hato'o liña jeral sira kona-ba objetivu, prinsipiu no rezultadu sira ne'ebé hakarak. Ida ne'e, hamutuk ho desizaun estratéjia sira ne'ebé KTE halo, forma baze ba planu estratéjia ne'e. Maioria husi tempu komisaun nian durante faze sira ne'e mak buka komprende rekizitu sira, diskusaun opsaun sira no buka atu hetan konsensu kona-ba desizaun sira ne'e.

Komisaun ne'e mos forma sub-ekipa tékniku ida atu dezeña infraestrutura bázika ba sistema ID Úniku bazeia ba solusaun sira ne'ebé rekomenda liu hosi análise ba sistema ne'ebé iha ona nomos prátika sira agora nian ne'ebé diak-liu. Ekipa ida ne'e hetan knaar atu halo análise SWOT (Pontu Forte, Fraku, Oportunidade no Ameasa) ba sistema CRVS agora dadaun no sistema alternativu ID Úniku separadu ida. Ekipa ne'e konsiste hosi membru sira hosi KTE ne'ebé iha background tékniku IT nian.

Ekipa legal ne'e konsiste hosi representante legal sira hosi PCM no Ministériu Justisa nomos hosi instituisaun membru KTE sira seluk. Ekipa legal lidera esforsu atu revé kuadru lejislativu sira no halo peskiza kona-ba lei privasidade no protesaun dadus ne'ebé fundamental kona-ba proteje direitu sidadaun sira atu proteje dadus pesoal hanesan define iha Artigu 38 Konstituisaun Timor-Leste. Servisu ba preparasaun Lei Privasidade no Protesaun Dadus (PPD) no Diploma Legislativu atu halo posivel IDU agora dadaun halo hela no hein bele kompleta iha tinan 2021 nia laran. Atu suporta ida ne'e, lei Krime-Sibernética no E-Komérsiu mos sei dezenvolve no preciza aprova iha tempu badak. Politika Siber-Seguransa governu nian ida sei dezenvolve mos. Servisu sira ne'e hetan apoiu hosi asesor USAID ne'ebé mak destaka iha TIC TIMOR.

Iha prosesu sira ne'e nia laran, komisaun hala'o enkontru dala 22, realiza apresentasaun ida ba Komisaun Interministerial, no hala'o enkontru hosi dok (virtual) atu komprende dezeñu hosi ID Úniku ne'ebé hanesan iha Cabo Verde, India, no Filipinas. Bazeia ba rezultadu hosi análize ne'e, komisaun halo esbosu ba planu estratéjiku inisial ida.



**Figura 2: Apresentasaun Esbosu Planu Estratéjiku ID Úniku ba Komisaun Interministerial**

Nudar Ministeriu xave be implementasaun, hala'o mos enkontrus lubuk ida ho Ministériu Justisa, liu-liu ho Diresaun Jerál Servisu Rejístu Notariádu (DJSRN). Enkontru hala'o mos ho Ezekutivu sira hosi Ministériu Justisa hodi fornese relatóriu no progresu.

#### **4.2.2 Esbosu Planu Estratéjiku Inisial**

Vizaun estratéjia ne'e mak atu fornese ba sidadaun no rezidente sira identidade dijital ne'ebé bele konfia hodi hetan (unlock) asesu ba servisu sira. Sistema ID Úniku ne'e nia objetivu atu hadi'ak asesu no prestasaun servisu ba sidadaun sira no ajuda Governu atu jere servisu sira ne'e diak liu.

Esbosu inisial apresenta ba Komisaun Interministerial ID Úniku nian iha loron 8 Setembru 2020 no iha tempu hanesan hetan avaliasaun hosi peritu esternal sira ba ID Úniku. Avaliasaun ne'e hala'o hosi peritu sira hosi ekipa Identifikasaun ba Dezenvolvimentu Banku Mundial (ID4D) nian, Ernst no Young (liu hosi kontaktu sira ADB nian), no UNDP.

Planu estratéjiku inisial foka kona-ba opsaun implementasaun ne'ebé atu halo rejistu ID Úniku ida hamutuk ho registrasaun Sertidaun Moris ho objetivu atu reforsa registrasaun sivil. Sertidaun Moris ne'e funsiona hanesan loke-dalan ida ba ID úniku ne'e katak ema ida liu-liu sidadaun ida labele fó ID Úniku ida bainhira nia laiha sertidaun moris ida. Implementasaun ba opsaun ida ne'e prezisa rejistu moris nian ida ne'ebé forte. Opsaun ida ne'e halo ona revizaun, tamba análize tékniku no legal tuir mai hetan katak sistema rejistu moris dijital agora nian teknikamente liu prazu ona no legalmente labele troka livru rejistu sira. Sistema Informasaun Jestaun Demográfiku (DMIS) ne'e, sistema ne'ebé kaer rejistu sivil iha deit 30% hosi populasaun ne'ebé dijitalizadu, ho livru rejistu moris ne'ebé bazeia ba surat tahan sei sai hanesan baze legal ba sidadania.

Situasaun ida ne'e obriga KTE atu buka alternativu sira, analiza opsaun ida-idak ho diak ninia vantajem no desvantajem sira hodi hili opsaun ida ne'ebé diak liu atu sai hanesan baze ba estratéjia ne'e. KTE la konsege hetan desizaun konsensual ida kona-ba opsaun sira ba implementasaun ne'e ba rejistu ema, ne'eduni, decide lori opsaun tolu ne'ebé posivel ba Konsellu Ministrus hodi decide opsaun ne'ebé prefere liu iha loron 20 Novembru 2020.

Desizaun estratéjiku hotu sira seluk hosi KTE ne'e halo ho desizaun konsensual ida.

### **4.3 Opsaun sira Implementasaun ID Úniku**

KTE propoen opsaun implementasaun tolu ba Konsellu Ministrus atu decide. Opsaun tolu ne'e mak:

**Opsaun 1:** Separasaun hosi registrasaun sivil no ID Úniku ("Modelu Filipina, India")

**Opsaun 2:** Halo hamutuk registrasaun sivil, no rekolha informasaun ID Úniku, iha tempu hanesan liga ID Úniku ba dadus biográfiku iha rejistu sivil. Opsaun ida ne'e hakerek iha

dokumentu esbosu Planu Estratéjiku ho objetivu atu reforsa rejistrasaun sivil (“Modelu Kenya”).

**Opsaun 3:** Inkorpora ID Úniku ba DMIS. Ida ne’e propoen hosi MJ hafoin iha akordu inisial ba Opsaun 2. (“Modelu Scandinavia”)

Diskusaun Tékniku sira ho peritu ID Úniku sira halo klaru katak “prátika diak liu” agora dadaun mak uza Opsaun #1 atu separa Rejistrasaun Sivil no registu IDU sira. Maibe, prefere katak entidade rua ne’e eziste tomak iha jestaun hanesan iha Ministériu úniku ida nia okos.

#### **4.3.1 Sertidaun Moris Opsional**

Iha modelu ida ne’e, rejistrasaun ID úniku separa hosi rejistrasaun ba sertidaun moris, iha ne’ebé sertidaun moris ne’e opsional. Modelu ida ne’e refere ba tuir “modelu Filipina, India” tamba hetan susesu implementasaun iha India no Filipinas. Nasaun seluk ne’ebé halo aprosimasaun ida ne’e inklui ezemplu Pakistaun, Malawi, Togo, no Tanzania. Nasaun Pasifiku sira buka hela atu implementa modelu ida ne’e.

Aprosimasaun ida ne’e maka aprosimasaun inkluzivu, lalais, ekonómiku liu tamba permite rejistrasaun ba ema ho sertidaun moris ida ka deklarasaun ida hosi autoridade lokal ba sira ne’ebé laiha sertidaun moris. Alende ne’e, Internet la presiza atu registu ema tamba modu offline ne’e bele disponivel hodi permite rejistrasaun ema iha área remota sira ne’ebé iha problema asesu ba internet. Ninia aprosimasaun minimu mos permite atu posibilita privasidade tuir dezeńu.

Iha modelu ida ne’e, sistema ID úniku halo hanesan plataforma ida ba sistema no database sira seluk, ezemplu, Kartaun BI, Kartaun Eleitoral, Kartaun Saúde, Kartaun Edukasaun atu utiliza informasaun Biométriku ne’ebé registu ona iha ID Úniku atu nune’e disponivel ba entidade aprovaadu sira ba finalidade autentikasaun no validasaun.

Administrasaun identidade legal mantein nafatin ho Ministériu Justisa. Bainhira implementa ona, Ministériu Justisa bele uza informasaun biométriku ne'e iha IDU atu fornese Kartaun BI ne'ebé hadi'ak ona (Smart BI). Rejistrasaun ba Rejistu Moris sei bele halo iha tempu hanesan ho rejistu ba ID úniku maibe hanesan prosesu ketak ida. Ida ne'e hasai tiha dependénsia inisial ba Rejistu Moris no sistema DMIS iha Ministériu Justika ba rejistrasaun inisial ba ema sira. Hafoin halo tiha rejistrasaun inisial ba ema hotu ne'ebé moris iha Timor-Leste, sistema DMIS ne'e sei sai vital hodi garante katak sistema IDU kontinua atualizadu nafatin ho moris no mate sira nune'e ligasaun forte ida entre DMIS ho IDU presiza duni. Rejistu Moris sei hadi'ak neneik tuir tempu liu hosi halo dadus korresponde ba-malu (matching) no hasai tiha duplikasaun sira.

#### **4.3.2 Sertidaun Moris Obrigatóriu (Prosesu Rejistrasaun Konjuntu)**

Modelu rejistrasaun konjuntu ka "Modelu Kenya" ne'e opsaun ida ne'ebé hakerek iha dokumentu esbosu inisial Planu Estratéjiku ho objetivu atu haforsa rejistrasaun sivil, hodi sakrifika prosesu rejistrasaun inkluzivu ida.

Opsaun ida ne'e fornese vantajem ba ID úniku dijital ne'e atu sai identidade legal ida nomos identidade dijital ida. Rejistrasaun simultánea ba rejistu moris no ID úniku laos deit hadi'ak rejistu moris maibe mos fornese informasaun biográfiku konsistente entre ID Úniku no bazedados Rejistu Moris.

Maibe, modelu ida ne'e iha desvantajem balun. Desvantajem ida mak presiza validasaun ba dadus biográfiku rejistrasaun sivil, ne'ebé bele adia rejistrasaun ID Úniku no sei presiza Ministériu Justisa atu sertifika versaun papel sira no rejistu online sira. Nune'e, presiza hadi'ak barak ba DMIS no koneksaun internet ida atu rejistu ema sira tamba agora dadaun laiha modu offline ba DMIS. Rejistrasaun ba rejistu sira ne'ebé iha ona DMIS konfia hela ba ezatidaun (accuracy) dadus ne'e ka ninia validasaun iha versaun papel. Rejistrasaun mos presiza aplika prosedur diferente ba tipu rejistu diferente tolu:


- i) ema ho dadus moris eletroniku (aprox 400,000).



- ii) ema rejistu moris ne'ebé bazeia ba surat tahan maibe laiha iha DMIS (aprox. 600,000); no
- iii) ema ne'ebé la rejistu (aprox. 300,000-500,000).

Tamba ne'e, opsaun ida ne'e bele implementa deit ho kooperasaun tomak hosi Ministériu Justisa, selae, opsaun #1 bele uza hanesan "Planu B" ida ba rejistrasaun.

Figura 3 hatudu diagrama ida kona-ba oinsa sistema fungsional sira komunika ba-malu ho sistema ID Úniku iha Opsaun 1 no 2.



**Figura 3: Sistema hotu komunika via sistema ID ÚNIKU**

#### 4.3.3 Rejistu Úniku (Presiza Sertidaun Moris)


Opsaun datolu ne'e propoen hosi Ministériu Justisa hafoin halo akordu inisial kona-ba Opsaun 2. Modelu ida ne'e koñesidu ho 'Modelu Scandinavia' tamba implementa ona iha nasaun sira iha Scandinavia hanesan Sweden, Norway, no Denmark. Tailandia koko atu implementa modelu ida

ne'e, maibe la kompleta ninia implementasaun. Agora dadaun, laiha nasaun ho rendimentu kiik ka nasaun dezenvolidu ida mak implementa modelu ida ne'e tamba konsidera nia kompleksidade.

Benefisiu ida hosi modelu ida ne'e maka bele produs identidade legal ida nomos ID dijital ida. Alende ne'e, permite atu estabelese rejistu komprensivu ida ne'ebé bele uza ba finalidade administrativu ka estatistiku oin-oin tamba nia fornese ligasaun kompletu hosi ID ÚNIKU no bazedadus Rejistu Moris. Maibe, modelu ida ne'e difisil teb-tebes atu dezeña no implementa no nia kustu hodi konsidera ninia arranju kompleksu sira. Difisil mos atu kalkula ninia kustu ba kombinasau rejistrasaun sivil no sistema ID Úniku ne'e tamba rua ne'e serve dadaun ba finalidade rua diferente. Implementa modelu ida ne'e presiza reforma substantial ba politika, reforma tékniku no legal antes rejistrasaun bele hahú tamba lejislasau ba registru sivil agora dadaun presiza atu halo revizaun nomos kria lejislasau foun ba ID Úniku.

Implementasaun ne'e mos presiza Rejistu Moris inisial no Kapasidade Estadu nian ne'ebé forte tebes, no koneksau internet ida atu rejistu ema tamba laiha modu offline ho sistema DMIS agora dadaun. Ne'e signifika tempu naruk liu atu hamos bazedadus sira seluk hosi duplikasaun, dadus falsu, no dadus mate klamar. Bainhira iha sistema rua ne'e hamutuk kria dependénsia ida ba sistema Rejistu Moris nomos lori mai ninia frakeza sira. Vulnerável liu ba na'ok dadus tamba asesu ba no integrasau ho ajénsia barak iha nivel ida profundu liu duke Opsau 1 ka 2. Informasaun pesoal ne'ebé aumenta iha rejistu moris mos bele kompromete privasidade, tamba ne'e hein atu enfrenta dezafiu legal sira hodi fokus ba kláusula privasidade Konstitusional.

Figura 4 hatudu diagrama ida kona-ba oinsa sistema fungsional komunika malu ho sistema ID Úniku ne'ebé halo parte sistema DMIS iha Ministériu Justisa.



**Figura 4: Sistema hotu komunika via DMIS**


#### 4.3.4 Liña-Tempu

Implementasaun ID Úniku presiza pelumenus prosesu tolu to'o hat tuir mai, depende ba modelu implementasaun sira. Prosesu sira ne'e maka:

1. Dezenvolvimentu institucional, lejislasaun, aprovizionamentu, no dezenvolvimentu sistema
2. Rejistrasaun
3. Halo prosesu/validasaun dados
4. Utilizasaun (autentikasaun) hosi masa kritiku

Opsaun tolu ne'ebé propoen hosi komisaun ne'e prezenta liña-tempu implementasaun diferente. Káلكulu ba liña-tempu ba opsaun 1 – rejistrasaun moris opsional badak liu hosi tolu sira ne'e. Ida ne'e tamba halo prosesu ba prosesamentu no validadasaun la inklui iha implementasaun no laiha mudansa substansial ne'ebé presiza ba reforma politika, tékniku no legal ba rejistrasaun ne'e atu hahú. Iha tempu hanesan, opsaun 2 no opsaun 3 presiza halo prosesu ba prosesamentu no validasaun.

Rejistu úniku (Opsaun 3) lori tempu naruk liu atu implementa tamba presiza barak liu maka dezvoltimentu institucional, lejislasaun, aprovisionamentu, no dezvoltimentu sistema antes hahú rejistrasaun. Alende ne'e, implementasaun opsaun ida ne'e sei lori tempu naruk tamba mudansa sira presiza halo ba Rejistrasaun Sivil nomos estabelesimentu ba lei ID Úniku (inklui Lei sira ba Privacidade Dadus no Siber-Seguransa). Iha sorin seluk, opsaun 1 no 2, la presiza mudansa ba Rejistrasaun Sivil, presiza deit Lei ID Úniku atu implementa. Liña-tempu diferente bele hare iha tabela tuir mai:



**Figure 5: Liña-Tempu Projetu**

#### 4.3.5 Jestaun Identidade Dijital

Inisiativa ID Úniku ne'e nia objetivu atu fornese ID dijital ida ba sidadaun no rezidente sira hotu. Aprosimsaun ne'ebé komisaun rekomenda mak ema ida-idak iha identidade úniku ida, no ema ida-idak sei iha kredensial ida atu prova no verifika sira nia identidade. Komisaun ne'e fornese definisaun simples ba termus legal no identidade dijital hanesan tuir mai.

**Identidade legal** mak karakteristiku báziku hosi identidade individual ida (ez., naran, seksu, fatin, no data moris), ne'ebé fo-ba nia liu hosi rejistrasaun no emisaun sertidaun ida hosi autoridade rejistrasaun sivil autorizadu hafoin akontese moris.

**Identidade dijital**, nu'udar kolesaun hosi atributu identidade sira ne'ebé kapta no rai-hela eletronikamente ne'ebé deskrevé unikamente ema ida iha kontestu partikulár ida no ne'ebé uza ba tranzasaun eletróniku sira.

Identidade legal fó liu hosi sertidaun moris. Identidade dijital ida rai informasaun identidade iha sistema komputerizadu ida, hodi permite ema ne'e atu asesu servisu sira iha plataforma komputerizadu barak nia laran. Parte "dijital" ne'e mak jere hosi TIC Timor, ne'ebé responsável ba E-Governu iha Timor-Leste. TIC sei garante informasaun identidade bele troka malu liu hosi formatu no padraun komun iha sistema multiplu laran no sei garante seguransa no privasidade dadus sidadaun sira nian. Ministériu Justisa, nudar autoridade ne'ebé responsável atu estabelese sidadania iha Timor-Leste mak responsável ba aspetu legal sira hosi identidade ne'e.

Ema ida nia identidade dijital sei inklui informasaun biográfiku básiku, ezemplu, naran, data moris, fatin moris, informasaun biométriku (oin, impresau dijital no karik matan), no número ID úniku. Número ida ne'e sei hela ho ema ne'e, hosi moris to'o mate. Identidade dijital sei uza ba finalidade validasaun no autentikasaun. Ida ne'e bele imprimi iha dokumentu ida ka hanesan kartaun ida, ezemplu iha India, imprimi iha surat tahan pedasuk ida, no iha Filipina, emite hanesan kartaun ida.

Ho konsidera nesidade atu garante seguransa no privasidade dadus identidade, komisaun mos rekomenta kria Ajénsia Identidade ida atu jere identidade dijital ne'e iha tempu naruk. Ajénsia identidade ne'e bele iha Ministériu Justisa nia okos, departamentu ida, ka ajénsia autónomu, independente ida. Maibe, ba tinan 5 dahaluk ne'e, hein katak UID sei hala'o hanesan projetu ida iha Unidade Estrutura ida ne'ebé sei tranzisaun ba jestaun longu prazu iha 2025. Buat sira ne'e ilustra iha figura 6.



**Figura 6: Jestaun Identidade Dijital**

Rekomendasaun sira ne'e hotu inklui opsaun implementasaun sira prezenta dahuluk ba Primeiru Ministru no ba Ministru Prezidénsia Konsellu Ministrus iha loraon 10 Novembru 2020 no ba Konsellu Ministrus iha loraon 20 Novembru 2020. Konsellu Ministrus adia halo desizaun to'o Kuarta, 25 Novembru 2020, bainhira sira hili Opsaun 1, Sertidaun Moris Opsional nudar metodu ne'ebé prefere. Ida ne'e fo ona klareza ba kompleta Planu Estratéjiku ne'e. Mandatu KTE nian prolonga ba fulan 6 iha tempu ne'ebá.



**Figura 7: Atualiza Progressu ba Primeiru Ministru**

#### **4.4 Komunikasaun & Konsultasaun**

Estratéjia komunikasaun mak komponente ida hosi planu estratéjiku ID Úniku. Planu komunikasaun foka ba estratéjia kona-ba oinsa atu hasa'e konsiensializasaun, komprensaun no koñesimentu ba parseiru xave sira iha governu, setor privadu, sosiedade sivil, etc. iha nivel rejional, nasional, no local kona-ba projetu ID Úniku. Estratéjia komunikasaun mos identifika mensajem xave no hare ba uza media social no tradisional atu influénsia no muda sidadaun no Ministériu nia koñesimentu, atitude, no hahalok ba objetivu sira hosi sistema IDU.

Rekoñese katak komunikasaun hosi benefisiu no risku sira hosi ID Úniku presiza atu jere didiak hodi garante katak iha interesse ba iha prosesu ne'e hosi setor hotu-hotu ho parte interessadu sira hotu.

Planu komunikasaun prepara hosi Especialista Komunikasaun, Sra Ana Teresa Sequeira hosi UNICEF iha konsultasaun besik ho Sekretariadu no membru sira hosi komisaun tékniku ID Úniku nian.

#### **4.5 Politika & Kuadru Legal sira**

Implementasaun ID Úniku presiza muda politika no lejislasaun foun barak. Análise ba lakuna legal sira hala'o tiha ona no prepara ona esbosu maibe presiza konsultasaun no diskusaun tan. Ida ne'e

inklui diploma Lejislativu atu Possibilita IDU hodi fornese baze legal ba ID Úniku, Privasidade Dadus no Lei Orgánika ba Protesaun, no Komisaun/Autoridade Nasional ida ba Privasidade no Protesaun Dadus. Servisu koba-ba halo esbosu lei rua ne'e komesa ona no hein atu remata iha tinan klaran 2021. Lei Orgánika Privasidade Dadus no Protesaun dahuluk apresenta ona no revé ona hosi asesor legal sira hosi membru entidade komisaun sira hotu iha 25 Fevereiru.



**Figura 8: Konsultasaun Lei Privasidade no Protesaun Dadus**

Kódigu Rejistrasaun Sivil foun ne'ebé propoen ona sei halo mos konsulta atu garante katak sistema rua ne'e servisu ho sinkroniza ba malu. Atu suporta ida ne'e, lei Krime-Sibernética no E-Komérsiu mos dezenvolve no aprova ona iha data inisiu kedas. Politika Seguransa-Sibernética governo nian sei dezenvolve mos.

#### **4.6 Re-estrutura (re-engineering) Bazedadus Funsional**

Atu bazedadus funsional hetan benefisiu hosi sistema IDU no vise-versa, sistema sira ne'e hanesan Kartaun BI, Kartaun Eleitoral, Karta Kondusaun, Kartaun Saúde, Kartaun Estudante, no bazedadus



fungsional sira seluk presiza atu re-estrutura fali. Aproximasaun ne'ebé projetu ID Úniku foti maka atu la muda tomak sistema agora dadaun maibe atu aumenta koluna ida tan 'field ID Úniku' iha bazedatus fungsional. Ho aumenta fatin ID úniku sei permite sistema sira ne'e komunika ba malu no hamos bazedatus ezistente hosi duplikasaun, rejistu falsu, no mate klamar sira.

Prosesu re-estruturasaun presiza investigasaun no diskusaun ho liña Ministériu sira. Rekrutamentu husi Analista Negósiu ida ho finansiamentu DFAT atu suporta servisu ne'e kompleta ona iha April 2021 no servisu dadaun iha Sekretariadu. Antesipa katak parseiru dezenvolvimentu sira seluk mos sei presiza atu kontribui Asisténsia Tékniku iha área ho sira nia interese, hodi kontrata analista negósiu sira iha sira nia Ministériu rasik.

## 5. Finalizasaun planu estratéjiku ID Úniku

Bazeia ba opsaun ne'ebé selesionadu no implementadu ne'ebé aprova ona hosi Konsellu Ministrus iha loron 20 Novembru 2020, komisaun kompleta ona esbosu estratéjia ida no hala'o konsultasaun ho parseiru oin-oin atu garante sira nia lian no preokupasaun sira hetan konsiderasaun.

Konsultasaun inisial inklui halo divulgasaun ba organizasaun Sociedade Sivil 37, entidade Empreza Privadu 15, inklui banku, fornecedor movel, no indústria TIC, Parseiru Dezenvolvimentu no ONG Internacional 22 no asesor legal 14 iha instituisaun membru KTE nia laran. Liu hosi konsultasaun sira ne'e, komisaun laos deit rekolla komentáriu sira kona-ba estratéjia maibe mos hetan informasaun atu kompleta planu operacional no orsamentu sira.



**Figura 9: Konsultasaun Estratéjia ID Úniku ho Parseiru Dezenvolvimentu sira**

Liu husi orientasaun no suporta husi ekipa Banku Mundial ID4D nian, komisaun ne'e dezenvolve planu operasional no orsamentu. Tamba númeru kazu COVID-19 aumenta makáas iha momentu ida ne'e, konsultasaun oin-ba-oin ho membru KTE sira hotu no komisaun interministerial la bele hala'o. Ne'eduni, komentáriu sira no aprovasaun ba planu operasional no orsamentu hala'o via email deit.



**Figura 10: Konsultasaun Estratéjia ID Úniku ho Organizaun Sociedade Sivil sira**

Versaun konsolidadu ida hosi estratéjia ne'e inklui planu operasional no orsamentu kompleta ona no apresenta ba Konsellu Ministrus ba halo apresiasaun iha loron 27 Maiu 2021. Planu estratéjiku ida ne'e bele hetan asesu no download hosi website ID Úniku ninian iha [www.uid.gov.tl](http://www.uid.gov.tl).



**Figura 11: Konsultasaun Estratéjia ID Úniku ho setor Privadu**

## 6. Preokupasaun no dezafius sira

Surtu COVID-19 sai dezafiu boot ida ne'ebé Komisaun Tékniku ID Úniku enfrenta durante nia mandatu tuir kedas ho inundasaun ne'ebé akontese durante Páskoa iha 2021. Enkontru boot no hasoru malu oin-ba-oin hetan limitasaun, ne'eduni, komisaun labele hala'o enkontru ne'ebé planu tiha ona. Hetan difikuldade atu hala'o enkontru sira online tamba barak laiha asesu ba komputer ka Internet iha uma, nune'e adia desizaun importante sira atu halo.

Dezafiu seluk ne'ebé kontribui atu adia servisu ne'e mak laiha orsamentu disponivel atu suporta enkontru semanal Komisaun nian, konsultasaun internal no esternal, tradusaun dokumentu sira, no auzénsia peritus ID Úniku nian atu orienta dezvoltimentu estratéjia integradu ne'e iha etapa inisial prosesu ne'e. Obstákulu sira ikus ne'e depois hetan rezolve liu hosi apoiu hosi parseiru dezvoltimentu sira Banku Mundial, GfD, UNDP no UNICEF.

## Aneksu 1 – Planu asaun

| Objetivu sira                                  | Estratéjia / Atividade sira   | Instituisaun/Ema sira Ne'ebé Involve | Prazu Tempu        | Indikador Susesu  |
|--|---|--------------------------------------|--------------------|---|
| Arranju Organizasional sira                    | <ul style="list-style-type: none"> <li>• Estabelese Sekretariadu projetu</li> <li>• Nomeia Jestor Sekretariadu nian</li> <li>• Organiza ekipa ida no fahe tarefa no dever sira</li> <li>• Suporta rekursu</li> <li>• Hala'ó enkontru dahuluk komisaun tékniku</li> </ul>        | TIC Timor, I.P                       | Juñu 2020          | <ul style="list-style-type: none"> <li>• Estabelese ona secretariadu ida no nomeia jestor ida</li> <li>• Forma ekipa tékniku ida no membru ekipa ida-idak komprende sira nia tarefa no dever sira</li> <li>• Identifika no aloka rekursus (orsamentu no facilidade sira)</li> </ul>                                     |
| Dezenvolve esbosu inisial ida                  | <ul style="list-style-type: none"> <li>• Revizaun dokumentu sira</li> <li>• Hala'ó konsultasaun internal governu nian</li> <li>• Hala'ó konsultasaun esternal diferente</li> <li>• Apresenta ba komisaun Interministerial</li> <li>• Apresenta ba Konsellu Ministrus</li> </ul> | Komisaun Tékniku                     | Juñu - Agostu 2020 | <ul style="list-style-type: none"> <li>• Revé ona dokumentu relevante sira</li> <li>• Konsultasaun hala'ó ona ho entidade esternal no internal</li> <li>• Halo esbosu no apresenta ona planu estratéjiku inisial ida ba Komisaun Interministerial</li> <li>• Apresenta ona opsaun sira ba Konsellu Ministrus</li> </ul> |
| Apresentasaun opsaun sira ba Planu Estratéjiku | <ul style="list-style-type: none"> <li>• Apresenta ba CoMs no hetan aprovasaun ba opsaun sira</li> <li>• Estensaun mandatu KTE</li> </ul>   | TIC Timor, I.P                       | Novembru           | CoMs hili opsaun Mandatu estende ba fulan 6   |

|  |   |                |                            |   |
|--|---|----------------|----------------------------|---|
| Dezenvolvimentu Planu Operasional no Orsamentu                           | <ul style="list-style-type: none"> <li>• Kriasaun planu Operasional, husi Planu Estratéjiku inisial</li> <li>• Konsultasaun ho Sosiedade Sivil, Parseiru Dezenvolvimentu no empreza privadu sira</li> <li>• Kriasaun orsamentu nivel áas</li> </ul> | TIC Timor, I.P | Novembru 2020 – Marsu 2021 | Halo ona esbosu Planu Operasional<br>Halo ona esbosu ba Orsamentu<br>Finaliza ona Esbosu ikus ba Planu Estratéjiku husi komentáriu sira husi konsultasaun públiku |
| Finalizasaun Planu Estratéjiku Integradu, Planu Operasional no Orsamentu | <ul style="list-style-type: none"> <li>• Kompletu ona Planu Estratéjiku Integradu, Planu Operasional no Orsamentu</li> <li>• Tradusaun</li> <li>• Aprezentasaun ba Konsellu Ministrus</li> </ul>  | TIC Timor, I.P | Marsu 2021 – Maiu 2021     | Konsellu Ministrus simu dokumentu final integradu   |

## Aneksu 2 – Kestionáriu Survey ID Úniku

### 1. Ita boot nia instituisaun naran sa?

---

### 2. Ita boot nia instituisaun iha sistema hamutuk hira (total) ?\*

---

*Favor priense informasaun detallu kona ba kada sistema, iha seksaun 'SISTEMA/MODULU' hosi pergunta 3 to'o 16.*

#### SISTEMA/MODULU

### 3. Sistema/module naran sa?\*

---

### 4. Sistema nia objetivu?\*

---

### 5. Se mak dezenvolve sistema ne'e?\*

---

### 6. Se mak agora dadaun mantein sistema ne'e?\*

---

### 7. Uza teknolojia saida?\*

- Microsoft SQL
- Oracle
- MySQL
- PostgreSQL
- Access
- MariaDB
- MongoDB
- Seluk
- Se seluk, favor especifica:  
\_\_\_\_\_

### 8. Koluna ka 'field' identidade saida deit mak sistema kolekta? Favor hili ida ne'ebé aplikável.\*

- Nome e Apalido
- Data de nascimento
- Morada atual
- Local de nascimento
- Endereço de e-mail
- Número de telefone
- Número Cartão de identificação
- Número Passaporte
- Número Cartão de eleitores
- Número Certidão de nascimento
- Número Certidão Baptismo
- Número Carta de condução
- Placa do carro / motor
- Nome dos pais
- Nomes dos avós
- Foto
- Impressões digitais 'Fingerprints'

- |  |   |   |
|--|---|---|
| <input type="radio"/> Iris / Eye Scan      | <input type="radio"/> Ocupação                          | <input type="radio"/> Detalhes da conta bancária  |
| <input type="radio"/> DNA                  | <input type="radio"/> Origem racial ou étnica           | <input type="radio"/> Seluk                       |
| <input type="radio"/> Cor dos olhos        | <input type="radio"/> Condenações / registros criminais | <input type="radio"/> Se seluk, favor especifica: |
| <input type="radio"/> Peso                 | <input type="radio"/> Partido político                  | _____   |
| <input type="radio"/> Altura               | <input type="radio"/> Religião                          | _____   |
| <input type="radio"/> Tatuagem ka 'tattoo' | <input type="radio"/> História / Informação Médica      |   |
| <input type="radio"/> Escolas frequentadas |   |   |

**9. Dokumentu (s) rekezitu ka 'breeder' saida deit mak precija atu halo registu iha Itaboot sira nia sistema?\***

- Númeru Certidaun Moris nian
- Númeru Certidaun Batismu nian
- Deklarasaun hosi Xefi Suco
- Deklarasaun hosi Igreja
- Númeru BI
- Númeru Kartaun Eleitoral
- Númeru Karta Kondusaun
- Seluk
- Se seluk, favor especifica: \_\_\_\_\_

**10. To'o agora sistema rekolha ona dadus hira?\***

\_\_\_\_\_

**11. Sistema lansa iha sa tinan?\***

\_\_\_\_\_

**12. Sistema ne'e fahe informasaun ho sistema seluk ka lae?\***

- Sim
- Lae

Se sim, fahe ho sistema ida ne'ebé? \_\_\_\_\_

Hosi Ministériu ida ne'ebé? \_\_\_\_\_

**13. Ita boot sira selu 'User Access Licence' ga lae?\***

- Sim
- Lae

**15. Sei fasil ga lae atu aumenta tan koluna 'Identifikador Úniku'?\***



- Sim
- Lae

**16. Problema saida deit mak enfrenta ka sai hanesan prekupasaun?\***

---

Se iha tan sistema seluk, halo favor priense nia informasaun detallu iha seksaun SISTEMA/MODULU, pergunta númeru 3 to'o 16.

**Favor priense naran, pozisaun no númeru telemovel/Email iha okos:**

Naran: \_\_\_\_\_

Pozisaun: \_\_\_\_\_

Num Telemóvel/Email: \_\_\_\_\_

**Obrigada wain!**

## Rekoñesimentu

Planu Estratájiku Integradu ID Úniku ne'e rezultadu hosi determinasaun sustentadu, dedikasaun, servisu makaas, no komitementu hosi Komisaun Tékniku ID Úniku. Servisu ne'e sei la konsege produs karik laiha apoiu eselente no orientasaun hosi Governu Konstitusional Da-8, Repúblika Demokrátika Timor-Leste.

Komisaun Tékniku ID Úniku hakarak atu espresa ninia gratidaun sinseru liu-liu ba Sua Excia Taur Matan Ruak, Primeiru Ministru agora nian ho Sua Excia Ministro Presidénsia Konsellu Ministrus no sira ida-idak nia eskritóriu hodi fornese apoiu makáas no orientasaun durante preparasaun estratájia ne'e.

Ami agradese ba Parseiru Dezenvolvimentu sira, ekipa Banku Mundial ID4D, UNDP, UNICEF, no Programa Governansa ba Dezenvolvimentu hodi fornese apoiu peritu tékniku sira. Ami mos hakarak atu espresa ami nia gratidaun sinseru ba Organizasaun Sosiedade Sivil, organizasaun setor Públiku no Privadu sira ne'ebé partisipa iha konsultasaun Estratájia ID Úniku, no ba sira nia tempu no esforsu atu hato'o sira persepsaun, opiniaun, no aspirasaun atu halo estratájia ne'e sai inklusivu posivel.

Agradesimentu espesial ba membru sira hotu hosi Komisaun Tékniku ID Úniku tamba foti tarefa importante ne'e hodi fornese dadus primáriu hodi hato'o ba estratájia no desizaun sira ne'ebé konsolida iha estratájia ne'e. Ami hakarak atu hato'o ami nia gratidaun ba Diretor no Staff IT sira ne'ebé partisipa iha enkontru KTE balun no iha survei ID Úniku ne'e.

Atu garante katak KTE ne'e halo progressu mak hetan supervizaun Sekretariadu nian. Sra Elizabeth Baptista nia kontribuisaun nudar Sekretária ho forsa xave ne'ebé kondus hodi garante ninia susesu. Hanesan mos, kontribuisaun Sr. Roberto C.D.S. Vicente (Koordenador KTE, TIC Timor), Sr Justo Fernandes (TIC Timor) no Sr Fausto Maia Gama (Presidénsia Konsellu Ministrus), ho assisténsia hosi Asesor sira PCM nian, Sr. Dan Kobb no Sra Cristina Lima, no asesor TIC nian Sr. David Air ne'ebé sai fundamental hodi garante katak Planu Estratájia Integradu hetan entrega.

Naran sira ne'ebé hakerek iha kraik ne'e hanesan koko atu hato'ó rekoñesimentu ba kontribuisaun ba individu sira ba sira nia esforsu importante sira.

### **Membru sira hosi Komisaun Interministerial ID Úniku**

S.Exa. Taur Matan Ruak, Ministru Interior

S.Exa. Armanda Berta dos Santos, Ministra Solidariedade Sosial, no Inklusaun

S.Exa. Fidelis Manuel Leite Magalhães, Ministru Presidénsia Konsellu Ministrus

S.Exa. Manuel Cárceres da Costa, Ministru Justisa

S.Exa. Rui Augusto Gomes, Ministru Finansas

S.Exa. Odete Maria Freitas Belo, Ministra Saúde

S.Exa. Armindo Maia, Ministru Edukasaun, Juventude no Desportu

S.Exa. Miguel Pereira de Carvalho, Ministru Administrasaun Estatal

S.Exa. Faustino Cardoso Gomes, Presidente Komisaun Funsau Públika

S.Exa. Roberto C. D.S. Vicente, Diretor Exekutivu TIC TIMOR I.P.

### **Membru sira hosi Komisaun Tékniku ID Úniku (Pontu Fokal sira)**

Sr. Roberto C. D.S. Vicente, TIC TIMOR I.P

Sr. Venceslau Quintão Guterres, Ministériu Finansas

Sr. Joao F. Borges, Ministériu Justisa

Sr. Marito Soares, Ministériu Edukasaun, Juventude no Desportu

Sr. Herculano da Silva Garcia, Ministériu Saúde

Sr. Benjamin Gama, Ministériu Interior

Sra. Tulia Onorina, Ministériu Administrasaun Estatal

Sr. Dionísio de Araujo, Ministériu Solidariedade Sosial, no Inklusaun

Sr. Cipriano da Costa Gino das Neves (matebian), Ministériu Solidariedade Sosial, no Inklusaun

Sr. Fausto Maia Gama, Ministériu Estadu, no Presidénsia Konsellu Ministrus

Sr. Joao Amorin, Komisaun Funsau Públika

### **Membru Ekipa Tékniku sira**

Sr. Justo Fernandes, TIC TIMOR I.P

Sr. Sothun Thay, Ministériu Finansas

Sr. Onorio dos Santos, Ministériu Finansas  
Sr. Agostinho Pereira, Ministériu Finansas  
Sr. Pinso Viera, Ministériu Justisa  
Sr. Jacob Barros, Ministériu Justisa  
Sr. Bernardino Freitas, Ministériu Justisa  
Sr. Canisio Pereira, Ministériu Administrasaun Estatal  
Sr. David da Costa, Ministériu Solidariedade Sosial, no Inkluzau  
Sr. Guilhermino de Deus, Komisaun Funsau Públika

### **Membru sira Ekipa Legal**

Sra. Cristina Lima  
Sr. William B. Garrison  
Sr. Nelinho Vital

### **Sekretariadu Identidade Úniku**

Sra. Elizabeth Baptista  
Sr. David Air  
Sr. Aleixo da Cruz  
Sra. Peregrina Amaral  
Sra. Gavia G.F. de Carvalho  
Sra. Filomena da Silva

### **Parseiru Dezenvolvimentu**

#### **Banku Mundial ID4D**

Sra. Natasha Beschorner  
Sr. Jonathan Marskell  
Sr. Ashok Pal Singh  
Sr. Emmanuel Claude Bernard Vassor

### **UNICEF**

Sra. Emmanuelle Collet

Sra. Hitomi Fujimoto  
Sr. Domingos da Costa  
Sr. Adelino dos Santos  
Sra. Ana Sequeira

***UNDP***

Sra. Lazima Onta Bhatta  
Sr. Calum Handforth  
Sr. Ulderico Zemachado



## **Sekretariadu ID Úniku**

TIC TIMOR I.P.  
Palácio do Governo  
Edifício nº 1  
Avenida Marginal  
Dili, Timor-Leste

[www.uid.gov.tl](http://www.uid.gov.tl)